


DEN AMBIENTE



"ZOGO" KETO BAY RONCANDO E CUERO

Ismael Orman mihor conoci como "Zogo" keto bay ta suta e cuero riba conga manera e so por. Zogo nos legendario tocado di conga cu su edad respeta, ainda ta activo den farandula y especialmente pa festivalnan di calypso, tumba y tambe pa paradanan di carnaval, e ta cooperando keto bay enormemente hunto cu e agrupacion Grasshopper pa engrandece nos carnaval musicalmente.

Ta un atraccion y placer pa mira y scucha Zogo suta riba e cuero di conga, y saca su ritmonan cu e tin den su sanger. Zogo su talento riba conga ta increible. Esaki a keda demostra tambe dia cu e tocado di conga di renombre mundial "Paredes", tocado di conga y man drechi di Carlos Santana tabata na Aruba. Paredes a duna un magnifico demostracion riba conga den Flor de Oriente, y Zogo tambe tabata presente.

Zogo tambe a haya oportunidad pa muestra Paredes kico e tin aden. Paredes a keda hopi impresionado pa e talento cu Zogo tin riba conga, y a declara cu Zogo ta un excelente tocado di cuero, cu por toca den cualquier orquesta grandi. Zogo for di mucha tabata den Skerpene na Curacao, caminda cu DEN AMBIENTE tambe a lanta. Den Skerpene e la siña toca trombone y tabata forma parti pa e orquesta Philharmonico.

Despues cu e la bira bon mucha e la sali for di Skerpene y e la cuminsa toca na aña '50 pa Los Duques. Despues di Los Duques e la bay forma parti pa Los Principes. Zogo a toca den diferente bon bandanan manera Combo Aruba, Sensacion del Caribe, Estrellas Musical y Vibracion 74. Un di e partinan mas sobresaliente di e carera largo y exitoso di Zogo tabata tempo cu e tabata forma parti di e agrupacion

Estrellas Musical, agrupacion cu nos por apreciar riba e potret.

Tambe cu Vibracion 74 hunto cu e rey di tumba di tur tempo Juancho Kock y e gran pianista cantante compositor Casin Giel, e tabata tin un temporada sublime. Zogo su instrumento mas favorito semper tabata conga y a laga trombone como su di dos instrumento. Su tata Leon Orman Zogo señor (q.e.p.d.) tabata un tremendo tocado di tambu.

Zogo su jiu homber Earl Orman cu actualmente ta formando parti pa Papito y su Doble Sabor, tambe ta demostrando cu e ta siguiendo e pasonan di Zogo y ta un excelente tocado di conga tambe. Zogo ta un di e prome tocadornan cu a habri un hotel na Aruba, esta Aruba Caribbean Hotel na aña 1959 conhuntamente cu defunto Alex Odor, Tito Flores y otro musiconan.

Tumba ta liga directo cu conga y Zogo no ta falta un tumba contest, tur aña e mester ta riba escenario pa ronca e cuero. Na aña 1989 tumba contest a wordo dedica merecidamente na Zogo. Segun Zogo cu actualmente mayoria di e bandanan ta toca casi tur e piesanan mucho pura, y ta lubida riba e bailadornan cu tin cu baila riba compas di e ritmo.

Loke nos falta ainda na Aruba ta musiconan cu mester sobresali riba nan instrumentonan y canto. Musiconan cu segun Zogo ta sobresali mas ta Hildward Croes, Claudius Phillips y Robert Jeand'or. Aruba tin hopi talento pa forma un fania all stars, pero ta escoge solamente integrantenan di bandanan popular pa simpatia, mientras cu tin musiconan di bandanan menos popular pero tog mas talentoso. Na Aruba nos no ta reconoce nos musiconan,



ESTRELLAS MUSICAL d.r.p.d. Donny Geerman, Shon pa Kelly, Eddy Giel, Dootchie Maduro, Chinto Werleman (q.e.p.d.), Melindo Dubero, Zogo Orman, Fenchí Luidens, Mirto Ras, Chaleco Werleman, Freddie Maduro, Henrie Kock, Humphrey Kelly.

pero tuma un ehempel di musiconan manera Robert, Hildward y Martin cu si ta wordo reconoci den exterior como gran musiconan.

Ta tristo pa bisa pero antes nos no tabata tin un asociacion di musico, pero nos tabata mas uni. Pero cu awor tin un asociacion di musico pa nos ta mas uni, nos mes ta bringa otro. A bira tempo pa e musiconan sinta y forma un asociacion mas stabil pa progreso di nos cultura.

Tambe a bira tempo pa e rey di tumba y calypso (roadmarch) no haña solamente un corona, pero tuma un ehempel di Curacao caminda nan ta haña un suma basta favorable. No ta solamente durante carnaval, jazzfestival y OTI mester tende di ASOMA, pero tambe organisa mas programanan durante aña. DEN AMBIENTE kier a gradici Zogo pa e entrevista aki, y sigui RONCA E CUERO BAY pa hopi aña mas ZOGO!!!!



PROFESSIONAL TATTOOS

Semper bo tabata kier TATTOO, pero no tabata sa ken pa confia ?

*Professional Design
* Safe & Steril
* Privacy

Traha bo appointment na TEL:36602

TELEFONAN DI DIARIO

22207-26747-35026-35023

